

आकाशवाणी

1 विदेश मंत्री डॉ. एस जयशंकर ते चीली दे विदेश मंत्री Alberto Van Klaveren अज्ज नमीं दिल्ली च भारत-चीली संयुक्त आयोग दी दुई बैठक दी सह अध्यक्षता करंगन।

2 संयुक्त संसद समिति नै वक्फ संशोधन विधेयक 2024 पर लोकें थमां सुझा मंगे न।

3 भारतीय जनता पार्टी नै पच्छिम बंगाल च कथित कोलकाता दुष्कर्म ते हत्या मामले च न्याय दी मंग करा'रदे विद्यार्थियें पर पुलस कार्रवाई दे विरोध च 12 घंटे दी बंद दा आह्वान कीता ऐ।

4 गुजरात च भारी बरखें कारण मौसम विभाग नै किश जिलें च अगले 48 घंटे लेई रेड अलर्ट जारी कीता। सौराष्ट्र ते कच्छ दे किश हिस्सें च मती थमां मती भारी बरखें दी पेशनगोई।

5 जय शाह जेहड़े BCCI ते मौजूदा सचिव न, अंतरराष्ट्रीय क्रिकेट परिषद दे अध्यक्ष चुने गे।

6 ते पैरालंपिक्स खेड़्वां 2024 अज्जै थमां पेरिस च शुरू।

<><><><><><><>

## MEA

विदेश मंत्री एस. जयशंकर ते चीली दे विदेश मंत्री अज्ज नमीं दिल्ली च भारत चीली संयुक्त आयोग दी दुई बैठक दी सह-अध्यक्षता करंगन। एहदे अलावा कलावेरेन होर भारत-चीली बपार सम्मेलन च बी हिस्सा लैंगन ते मगरा मुम्बई लेई रवाना होंगन। चीली दे विदेश मंत्री अलबर्टो वैन होर कल नमीं दिल्ली पुज्जे हे। लेटिन अमरीकी क्षेत्र च चीली भारत दा मुख भ्याल ऐ। मंत्री कलावेरेन हुंदी एह यात्रा दौनें मुलखें लेई दपक्खिया सरबंधें च होई दी तरक्की ते समीक्षा करने दा मौका उपलब्ध करोआग ते एहदे कन्नै गै साथ-सहयोग ते सरबंधें गी होर मजबूत करने लेई नमें रस्ते खोललग।

<><><><><><>

## PM Peace Russia

प्रधानमंत्री नरेंद्र मोदी होरें रूस ते यूक्रेन टकराव गी स्थाई ते शांतिपूर्ण तरीके कन्नै हल करने लेई समर्थन देने दी भारत दी प्रतिबद्धता गी फही पक्का कीता। प्रधानमंत्री मोदी होरें रूस दे राष्ट्रपति ब्लादीमीर पुतिन हुंदे कन्नै टेलीफोन पर गल्लबात कीती ते रूस-यूक्रेन टकराव बारै दृष्टिकोण गी आपं च सांझा कीता। इक सोशल मीडिया पोस्ट च मोदी होरें आखेआ जे उनें पुतिन हुंदे कन्नै गल्लबात कीती ते विशेषाधिकार प्राप्त रणनीतिक सांझेदारी होर मजबूत करने दे उपाएं बारै चर्चा कीत। प्रधानमंत्री होरें आखेआ जे उनें हाल च गै यूक्रेन दे दौरे थमां अपनी जानकारी सांझा कीती ऐ।

<><><><><><>

### WAQF

संसद दी संयुक्त समिति नै वक्फ संशोधन विधेयक 2024 दे बारे च लोकें, गैर सरकारी संगठनों, माहिरें ते हितधारकें थमां विचार ते सुझा मंगे न। लोकसभा सचिवालय नै आखेआ ऐ जे समिति गी लिखित सुझा हिंदी या अंग्रेजी दऊं कापियें च भेजी जाई सकदे न। विचार ते सुझा [jpcwaqf-rss@sansad.nic.in](mailto:jpcwaqf-rss@sansad.nic.in) पर ई मेल कीते जाई सकदे न। एह सुझा 15 दिनें दे अंदर-अंदर पुज्जना लोड़चदे।

<><><><><><>

### India-Economy

सूचना ते प्रसारण मंत्री अश्विनी वैष्णव होरें आखेआ जे भारत तौले गै दुनिया दी त्री सब्बनें शा बड़्डी अर्थ बवस्था बनी जाग। मंत्री होरें जे.एम.एफ दी वर्ल्ड आउटलुक रिपोर्ट च तैयार कीती गेदी विकास दरें बारे दस्सेया जेदे च दस्सेया गेदा ऐ जे भारत 2024 च 7 प्रतिशत दी विकास दर कन्ने बदारदी अर्थ बवस्था ऐ। एहदे बाद चीन दी 5 प्रतिशत दी अनुमानित विकास दर ऐ। इस्सलै दुनिया दी सारें शा बड़्डी अर्थ बवस्था आहली अमरीका लेई 28 अशारिया 8 ट्रिलियन डालर दी जीडीपी कन्ने विकास दर दा अनुमान 2 इशारिया 6 प्रतिशत ऐ जेदे कन्ने बदधी अर्थ बवस्था दी रफ्तार च ओह 7मीं थाहर पर आंदी ऐ।

<><><><><><>

## BJP-Bandh

भारतीय जनता पार्टी नै पच्छिम बंगाल च कथित कोलकाता दुष्कर्म ते हत्या मामले च न्याय दी मंग करा रदे विद्यार्थियों पर पुलस आस्सेया कीती गेदी कार्रवाई ते विरोध च पच्छिम बंगाल च 12 घंटे लेई बंद दा आह्वान कीता ऐ। प्रदर्शनकारी मुखमंत्री ममता बनर्जी दे इस्तीफे दी मंग करा रदे हे ते आरजी कर मेडिकल कालेज ते अस्पताल च महिला डाक्टर कन्नै दुष्कर्म ते हत्या च कथित तौर पर शामिल लोकें गी गिरफ्तार करने दी मंग करा रदे हे।

<><><><><><>

## Maldives

विदेश मंत्रालय दा इक्क उच्ची सतह दा प्रतिनिधिमंडल टापू च विकास सहयोग प्रोजेक्टें दी प्रगति दी समीक्षा करने लेई मालद्वीप च ऐ। विशेष सचिव ते वित्तीय सलाहकार अनुराग अग्रवाल हुंदी अगुवाई च प्रतिनिधिमंडल नै मालद्वीप दे मंत्रियों ते सरकार दे बड्डे अधिकारियों कन्नै नतीजाकुन चर्चा कीती। एह प्रतिनिधिमंडल अज्जै तगर मालद्वीप च गै ऐ।

<><><><><><>

## Nomination

जम्मू-कश्मीर च पैहले गेड़ तैहत कुल 24 असैम्बली सीटें लेई होने आले चुनां आस्तै कुल 279 मेदवार चुनां मैदान च न। इनें मेदवारें दे सियासी भविकख दा फैसला कुल 23 लक्ख 27 जहार मतदाता करंगन जिंदे च 5 लक्ख 66 जहार युवा मतदाता न। मेदवारें आस्सेया दाखल नामजदगिएं दी जांच अज्ज कीती जाग ते 30 अगस्त तगर मेदवारी वापस लैती जाई सकदी ऐ। जम्मू संभाग दे त्रै जिलें- डोडा, किश्तवाड़ ते रामबन दिएं 8 असैम्बली सीटें लेई कल नामांकन दाखल करने दे खीरी ध्याड़े 96 मेदवारें अपने नामांकन दाखल करोआए न।

<><><><><><>

## Gujarat Rain

मौसम विभाग नै गुजरात दे सौराष्ट्र ते कच्छ दी बक्ख-बक्ख थाहरें पर तेज बरखा पौने दा अंदाजा लाने दे कन्नोकन्नी 48 घंटे आस्तै राज्य दे केई जिलें च रेड अलर्ट जारी कीता ऐ। मध्य ते दक्खन गुजरात दे जिलें आस्तै तेज बरखा दा ओरेंज अलर्ट जारी कीता गेआ ऐ। विभाग नै अहमदाबाद, बडोदरा सने केई जिलें आस्तै चानचक्क हाड़ औने दे खतरे दी चेतावनी दिती ऐ। इस्सै दौरान गुजरात च बड्डे पैमाने पर बरखा होई। गुजरात दी 200 तहसीलें च हल्की थवां भारी बरखा होई। भारी बरखें गी दिक्खदे होई हाड़ प्रभावित इलाकें च स्कूलें गी बंद रक्खेआ गेआ ऐ।

<><><><><><><>

### Jay-Shah-ICC

भारतीय क्रिकेट कंट्रोल बोर्ड बीसीसीआई दे सचिव जय शाह होर अंतरराष्ट्रीय क्रिकेट परिषद आईसीसी दे निर्विरोध अध्यक्ष चुनी लैते गए न। ओह पैहली दिसंबर 2024 थां एह औहदा संभालंगन। एहदे कन्नै गै 35 बरें दे शाह सब्बन थवां घट्ट उम्मी दे आईसीसी अध्यक्ष बनी जांगन। इस महीने दी 20 तरीक गी एह घोषणा कीती गई जे आईसीसी दे मौजूदा अध्यक्ष ग्रेग बार्कले त्रीए कार्यकाल आस्तै अगगे नेई औना चाहंदे न। उनें मेदवारी छोड़ी दिती ऐ।

<><><><><><><>

### Para-Olympics

2024 पैरालंपिक खेड़ें दी शुरूआत अज्ज पैरिस च होआ रदी ऐ ते एह 8 सितंबर तगर चलोग। एह पैहली बारी ऐ जे फ्रांस समर पैरालंपिक्स दा आयोजन करा रदा ऐ। एहदे च कुल 84 भारतीय पैरा एथलीट हिस्सा लै रदे न।

<><><><><><><>

### NSG

भारतीय पुलस सेवा दे वरिष्ठ अधिकारी बी. श्रीनिवारन होरें गी मुख्यै दे आतंकवाद रोधी बल राष्ट्रीय सुरक्षा गार्ड-एनएसजी दा महानिदेशक नियुक्त कीता गेआ ऐ। श्रीनिवासन भारतीय पुलस सेवा दे बिहार काडर दे 1992 बैच दे अधिकारी न। मंत्रीमंडल दी नियुक्तिएं सरबन्धी समिति नै श्रीनिवासन हुंदी

नियुक्ति दी मंजूरी दिती। ओह फिलहाल राजगीर स्थित बिहार पुलिस अकादमी दे निदेशक न।

<><><><><><>

### **Railways-Appointment**

भारतीय रेलवे प्रबंधन सेवा दे अधिकारी सतीश कुमार होरें गी रेलवे बोर्ड दा अध्यक्ष ते मुख कार्रकारी अधिकारी नियुक्त कीता ऐ। एह नियुक्ति अगले महीने दी पैहली तरीक गी ओहदा सांभाने दी तरीक थां लेइए उंदे पिंशनी होने तगर प्रभावी रौहग। एहदे मगरा पैहली जनवरी 2025 तगर ओह अनुबंध दे आधार पर परतिए नियुक्त रौहंगन।

<><><><><><>

### **Textiles**

कपडा मंत्रालय नै 4 नमें स्टार्ट अप गी मंजूरी दिती ऐ। राश्ट्रीय तकनीकी कपड़ा मिशन दी अध्यक्षता च होई दी मते इख्तयारें आली समिति दी 8मीं बैठक च हर इक स्टार्ट अप आस्तै तकरीबन 50 लक्ख रपे दे अनुदान दी बी मंजूरी दिती गेई।

<><><><><><>

## **AP-Cabinet**

आंध्र प्रदेश दी सरकार अपनी मंत्री परिषद दी बैठकें लेई ई-कैबिनेट प्रणाली लागू करा रदी ऐ जेड़ी अज्जै दे सत्र थमां शुरू होग। राश्ट्री सूचना विज्ञान केंद्र एन.आई.सी आस्सेया विकसित कीती गेदी इस नमीं प्रणाली दा मकसद मंत्री परिषदें दी बैठकें गी कागज मुक्त करना ऐ। ई कैबिनेट एप्लीकेशन मंत्रीमंडल दे दस्तावेजें, चर्चाएं लेई इक सुरक्षित ते रियल टेनिस मंच उपलब्ध करोआग। एहदे कन्नै कागजी कार्रवाई दे लोड च कमी औग।

<><><><><><>